

國初
群雄事略

國
家
年
鑄
布
幣

國初羣雄事略卷三

虞山錢謙益牧齋甫編

天完徐壽輝

壽輝一名貞一蘄州羅田縣人至正十一年十月僭稱皇帝國號天完改元治平在位十年爲陳友諒所弑

至正十一年

辛卯治平元年

八月蘄州羅田縣人徐貞一名壽輝與黃州麻城人鄒普勝等以妖術陰謀聚眾遂舉兵爲亂以紅巾爲號

元史

紅巾起蘄黃者宗彭瑩玉和尙推徐貞一爲首陷德安鄱陽安陸武昌江陵江西諸郡

庚申外史

壽輝體貌魁岸木強無他能以燒香聚眾起初袁州慈化

寺僧彭瑩玉以妖術惑眾其徒周子旺因聚眾欲作亂事
覺元江西行省發兵捕誅子旺瑩玉等走至淮西匿民家
捕不獲旣而麻城人鄒普勝復以其術鼓妖言謂彌勒佛
下生當爲世主遂起兵爲亂以壽輝相貌異眾乃推以爲
主舉紅巾爲號實錄徐貞一本傳

先是瀏陽有彭和尙能爲偈頌勸人念彌勒佛遇夜然火
炬名香念偈拜禮愚民信之其徒遂眾徐貞一本湖南人
姿狀龐厚無他長生平以販布爲業往來蘄黃間及妖人
彭鼓眾欲爲亂思得其主一日徐於鹽塘水中浴眾見其
身有光眾皆驚異遂立爲帝反於蘄春東南遂大亂湖廣
江西浙江三省城池多陷沒開運臺省於蘄春然姿性寬

縱權在臣下徒存空名爾

草木子

正正十一年中原盜起壽輝於山中獲口鐵十斤麻城鐵工鄒普勝居耦壽輝夜夢有黃龍蟠其鐵砧明日壽輝攜鐵過之令製耰鉏蹲坐鐵砧上普勝心異之告之曰今天下尙須耰鉏活耶當鍊一劍贈君耳於是兩人深相結陰謀舉大事會彭和尙妖黨作亂普勝乃與眾共推壽輝爲主舉兵以紅巾爲號借聖人堂於多雲山中溪水日再潮流傍有巨石狀類癢舟壽輝命鑿一穴樹梔其上祝之曰天助壽輝當揚帆出溪口石爲行十餘丈壽輝遂決意反

湖廣總志

彭祖師惑荆襄民徐貞一據蘄州稱帝徵饑郡民率眾掠

江淵 俞本紀事錄

九月徐壽輝陷蘄水路及黃州路元史

十一年徐壽輝起蘄黃威順王寬徹不花與其子別帖木兒荅帖木兒引兵至金剛臺壽輝部將倪文俊敗之執帖木兒威順王世祖之孫賜金印鎮武昌元史威順王傳

沔陽盜倪文俊號蠻子世以漁業居黃州黃陂其生之夕母夢有白虎入室及徐僭號倪爲僞相用多槳船疾如風晝夜兼行湖江出沒故多克捷所至殺害據威順王諸子妻其妃子庚申帝特降詔招撫然亂端已成俱無所及王諸子竟爲所殺荆岳潭鄂黃蘄澧安陸常德寶慶江虔洪吉等州皆爲所據然驕恣不撫其下后竟爲其下所殺前

夕母復夢白虎死遂遇戮戮之一二日前有大星落蠻子
舟前蠻子曰必有大官人當死吾手不知其身當之也其
弟倪文郁同亂后封長沙王鎮岳州蠻子誅文郁亦見殺
獨季弟倪七不從亂亦不及禍今尙居漢川縣耕稼爲業
富於牛田

草木子

九月蘄州總管李孝先分守蘄州縣死之贈河南參政謚
義愍

王逢詩序

十月徐壽輝據蘄水爲都國號天完僭稱皇帝改元治平以
鄒普勝爲太師

元史

攻陷饒州又陷信州

元史續編

魏中立以陝西行臺御史中丞遷守饒州以義兵擊賊被

執以紅巾被其身立叱之鬚髮盡張執歸蘄水大罵不已
遂被害總管于大本以土兵備禦賊首項甲破東門而入
執大本至蘄水爲俘獻僞主釋其縛畀僞印一鈕大本投
印於地指僞主痛詈之亦遇害

元史忠義傳

至正十二年

壬辰治平二年

正月丙辰徐壽輝遣僞將丁普郎徐明遠陷漢陽丁巳陷興
國府己未徐壽輝遣鄒普勝陷武昌威順王寬徹普化湖廣
行省平章政事和尙棄城走

元史

詔追奪寬徹普化印而誅和尙

元史寬徹普化傳

正月孟海馬陷襄陽徐真遠陷湖廣其將曾元帥陷安陸

江陵

庚申外史

辛酉徐壽輝遣僞將曾法興陷安陸府知府丑閻不勝死之
元史

蘄賊曾法興犯安陸丑閻敗賊前隊乘勝追賊而賊自他
門入亟還朝服坐公堂賊脅以白刃丑閻疾叱之賊以刀
斫石脅斷而死

辛未徐壽輝兵陷沔陽府

元史

蘄黃賊逼境推官俞述祖領民兵守綠水洪城陷被執械
至僞主徐壽輝所述祖罵不輟壽輝怒支解之元史忠義傳
壬申中興路陷山南宣慰司同知月古驕失出戰眾潰宣慰
使錦州不花山南廉訪使卜禮月敦皆遁走

元史

十二年寇犯中興山南廉訪使卜禮牙敦以兵與抗射賊

多死明日擁眾來襲東門力戰被執不屈而死又明日賊復來攻中興判官上都統兵出擊之既而東門失守上都倉皇反鬪被執大罵賊刳其腹而死

元史忠義傳

順帝本紀廉訪卜禮月敦遁忠義傳云被執死當以忠義傳爲正曾法興陷安陸又陷沔州及中興路

實錄

二月乙酉徐壽輝兵陷江州總管李黼死之遂陷南康路

元史

初盜陷蘄黃造船北岸銳意南攻九江雖下流竇東西襟喉之地黼上攻守之策於江西行省請兵屯江北以拒賊衝不報及渡江陷武昌舳艤蔽江以下江西大震乘勝破瑞昌右丞李羅帖木兒方軍於江聞之遁遊兵至境倉卒無號墨士卒面統之出戰賊大敗殺獲一萬餘黼曰賊不

利於陸必以舟薄我乃以長木數千冒鐵錐於杪暗植沿岸水中逆刺賊舟謂之七星櫓賊舟揚帆順流而下舟遇椿不得動繩發火翎箭射之焚溺無算時西自荆湖東際淮甸守臣往往棄城遁潰守孤城提辱旅中外援絕二月甲申賊將薄城分省平章政事禿堅不花自北門遁賊攻入北門與之巷戰知力不敵揮劍叱曰殺我無殺百姓賊自巷背來刺繩墜馬與從子秉昭俱罵賊而死元史忠義傳

丙戌徐壽輝兵陷岳州

元史

是月徐壽輝僞將歐普祥陷袁州

元史

二月陷江州南康分兵歸州岳州房州三月遣歐普祥陷

袁州

實錄

普祥黃州黃岡人歲辛卯從徐壽輝以燒香起兵爲元帥人稱爲歐道人壬辰二月引兵掠江西諸郡縣攻陷袁州焚室廬掠人民以去遣別將守之旣而分宜縣人彭繼凱與元帥別速堅起義兵復袁州普祥怒九月復往攻之不克乃攻陷分宜新喻等縣括其丁壯團結營寨癸巳二月復攻袁州元帥別速堅與萬戶寶同等堅守城中民困食盡死者相枕籍十二月城陷普祥遂據之分兵陷吉之安福瑞之上高等縣與元兵屢戰屢勝壽輝屢加普祥左丞大司徒袁國公普祥性殘暴所過室廬皆殘掠無遺庚子歲陳友諒弑壽輝徵兵於普祥普祥不聽其節制壬寅王師取江西普祥令其子文廣納款歸附上厚賜之命普

祥仍以本部軍馬守袁州甲辰六月丁巳卒

實錄歐普祥本傳

至正十二年歐道人據袁州

俞本記事錄

三月丁未徐壽輝僞將許甲攻衡州洞官黃安撫敗之僞將陶九陷瑞州總管禹蘇福萬戶張岳敗之甲子僞將項普略饒州路遂陷徽州信州

元史

正月湖廣陷禿堅不花由江州遁還二月普顏不花將兵往江州至石頭渡遇賊戰敗江西行省平章政事卽懷省印遁走普顏不花還與張伯顏定城守之計後數日道童始自南昌民家歸來三月賊眾來圍城凡兩月民無離志因奮擊敗賊走之

元史道童傳

饒志彭翼達項普略破吉安路彭翼卽彭和尚一名妖彭

平胡錄

國朝卷三

閏三月乙酉徐壽輝僞將陳普文陷吉安路鄉民羅明遠起義兵復之

元史

已而普文反兵復陷其城

實錄

閏月十三日斬黃紅巾自江州直抵廬陵攻破吉安鄉民羅明遠復之

平胡錄

丁酉湖廣行省參知政事鐵傑以湖南兵復岳州四月乙卯鐵傑及萬戶陶夢貞復武昌漢陽尋再陷

元史

辛未荊門知州聶炳復荊門州

元史

炳知荊門州纔半歲淮漢賊起荊門不守炳出募土兵得眾七萬復荊州又與四川行省平章咬住復江陵其功居

多元史忠義傳

五月乙卯咬住復中興路

野峻台升四川行省參政與平章咬住討賊賊方據巴東縣攻拔之平歸陝等州進拔枝江松滋兩縣乘勝趨江陵據清水門與賊戰三時頃咬住軍止百步外不救賊飛槍刺之遂死

元史忠義傳

七月庚辰饒徽賊犯昱嶺關陷杭州路

元史

賊攻昱嶺關鎮撫桂完澤再戰關下皆勝尋與其妻弟全德皆被執反縛於樹臨以白刃完澤呼德曰全舅男子漢卽死不可聽賊因大罵賊怒剖二人之腹而死

元史忠義傳

賊犯餘杭江浙行省參知政事樊執敬調兵出戰皆不利

賊至執敬遽上馬率兵出中途與賊遇射死七人賊墳溢
街巷縱火眾潰執敬奮力斫賊中槍而墮從僕田也先馳
救之亦中槍死

元史忠義傳

至正壬辰七月十日徵寇犯杭樊時中執敬爲浙省參政
禦於歲寒橋遂死之

王蓬梧溪集

壬辰秋蘄黃徐壽輝賊黨攻破昱嶺關徑抵餘杭縣七月
初十日入杭州城僞帥項蔡楊蘇一屯明慶寺一屯北關
門妙行寺稱彌勒佛出世以惑眾浙江省參政樊執敬死於
天水橋寶哥與妻同溺於西湖其賊不殺不淫招民投附
者注姓名於簿籍府庫金帛悉輦以去至二十六日浙西
廉訪使自紹興率鹽場寵丁過江同羅木營官軍剋復城

池賊遂潰散三平章定定逃往嘉興郎中脫脫過江南越數日攜省印來會權署省事至是亦同四平章教化自湖州統軍歸舉火焚城殘傷殆盡附賊充僞職者范縣尹等明正典刑里豪施尊禮顧八爲迎敵官軍剏於市家產悉沒縣官明慶妙行亦然省都事以下坐失守城池罷黜不敘省官復任如故朝廷法度既墮刑賞失宜欲天下太平不可復得矣

董搏霄率兵攻杭州遂復徽州

元史續編

搏霄從江浙平章教化移軍援江南遂渡江至湖州德清縣而賊已陷杭州搏霄曰賊皆野人見杭城子女玉帛必縱慾不暇爲備宜急攻之今若退保湖州賊乘銳趨京口